

На хвалих

стихиры, на 4, глас 8. Самоподобен:

1. Стих: Хвалите Его на силах Его,/ хвалите Его по множеству величествия Его.

2. Стих: Хвалите Его во гласе трубнем,/ хвалите Его во псалтири и гуслех.

О преславного чудесé!/ Живоносный сад, Крёст пресвятый,/ на высоту возносим явле́тся днéсь:/ славословят вси концы земний,/ устрашаются дёмонския полки./ **О** каковый дар земны́м дарова́ся,/ имже Христе спаси души на́ша,// яко Един Благоутрóбен. [Дважды.]

3. Стих: Хвалите Его в тимпане и лице,/ хвалите Его во струнах и органе.

О преславного чудесé,/ яко грозд исполнен животá,/ понéсый Вы́шняго,/ от земли́ воздвизаем Крест ви́дится днéсь,/ имже вси к Богу привлекóхомся,/ и пожерта бы́сть до конца смéрть./ **О** Дре́во пречестнóе,/ имже восприяхом во едеме безсмертную пи́щу,// Христа слáвящe.

4. Стих: Хвалите Его в кимвах добrogласных, хвалите Его в кимвах восклицания./ Всякое дыхание да хвалит Господа.

О преславного чудесé,/ широта Креста и долгота небеси равнá есть:/ яко Божественною благодатию освяща́ет всяческая./ **О** сéм языцы варварстии побежда́ются,/ о сем скиптри царей утвержда́ются,/ о божéственныея лéствицы,/ ёюже восходим на небесá,// возносяще в песнях Христа Гóспода.

Слава, и ныне, глас 6:

Днесь происходит Крест Господень,/ и верни приемлют того желáнием,/ и вземлют исцеления души же и тела, и всякия болéзни./ Сего целуим радостию и страхом,/ страхом греха ради, яко недостойни сúще:/ радостию же спасения ráди,/ еже подает миру на том пригвоздившийся Христóс Бог,// имеяй вéлию милость.

И славословие великое тихо и согласно поют.

Поему же великому славословию, облачится настоятель во всю священную одежду, и приемлет кадильницу с фимиамом, и приходит ко святей трапезе, и кадит честный Крест крестообразно, и взимает его на главу, и исходит северными дверьми, предыдущим ему со двема лампадами даже до Царских

врат, и тамо став ожидает конца славословия и Трисвятаго. Сему же скончану, возглашает настоятель велегласно:

Премудрость, прости.

Мы же начинаем тропарь, глас 1:

Спаси Господи люди Твоя,/ и благослови достояние Твое,/ победы [православным христианом] на сопротивныя даруя,// и Твое сохраняя Крестом Твоим жительство. [Трижды.]

И приходит настоятель, нося на главе честный Крест до среды церкве пред святыя Царских двери: тамо убо уготовану аналогию, полагает верху его честный Крест, и кадит крестообразно. Также творит поклоны три до земли, в койлибо буди день, и взем честный Крест с благовонными василками, на подножии Креста обложенными, станет пред аналогием зря к востоком.

И диакон возглашает велегласно во услышание всех: Помилуй нас Боже, по велицей милости Твоей, молимся Тебе, услыши нас Господи, и помилуй, рцем вси.

И начинаем первую сотницу: Господи помилуй, 50: знаменующу настоятелю в начале честным Крестом, трижды. Также преклоняет главу, елико пядиу отстояти главе от земли, и помалу воздвигается горе даже до скончания втораго, 50, Господи помилуй. Егда же доспехт до 97, Господи помилуй, возвышает глас свой екклисиарх, настоятель же прямо стоя, и конца сотницы ожидая, знаменует Крестом паки трижды.

Также обращается к западней стране. И глаголет диакон: Еще молимся о милости, жизни и оставлении грехов великаго господина и отца нашего Святейшаго Патриарха Алексия и господина нашего преосвященнейшаго епископа [или архиепископа, или митрополита] [имярек] и всего о Христе братства нашего, о здравии и о спасении, рцем вси. **И начинаем вторую сотницу,** Господи помилуй. **И творит настоятель второе воздвижение,** якоже преднаписася.

Также обращается к полуденной стране. И глаголет диакон: Еще молимся о Богохранимей стране нашей Российской, о властех и воинстве ея, да тихое и безмолвное житие поживем во всяком благочестии и чистоте. **И начинаем третию сотницу,** Господи помилуй.

Скончаваем же той, обращается настоятель к северной стране. И глаголет диакон: Еще молимся о всякой души христианстей, скорбящей же и озлобленней, здравия, спасения, и оставления грехов требующей, рцем вси. **И начинаем четвертую сотницу,** Господи помилуй. **И бывает четвертое воздвижение.**

И обращается настоятель к востоком. И глаголет диакон: Еще молимся о всех служащих и послуживших во святем храме сем [или обители сей], отец и братий наших, о здравии и о спасении, и оставлении грехов их, рцем вси. **И начинаем пятую сотницу,** Господи помилуй. **По пятом же воздвижениях, поем:**

Слава, и ныне: Кондак, глас 4:

Вознесыйся на Крест волею,/ тезоименитому Твоему новому жительству,/ щедроты Твоя даруй Христе Бóже,/ возвесели силою Твою верныя люди Твойя,/ победы дая им на сопостáты,/ пособие имущим Твое, оружие мýра,// непобедимую победу.

Поему же сему, полагает настоятель честное древо Креста на аналогии, и поет тропарь сей во глас 6: Кресту Твоему покланяемся Владыко, и святое воскресение Твое славим. Трижды. Поющим же и братиям тойже тропарь начинает кланяться настоятель, и творит метания два пред честным Крестом, также целует его. По целовании же творит паки едино метание, такожде и на оба лика по единому метанию. По сем приходят братия вся: по чину покланяются, и целуют честный Крест.

Поем же и стихиры, дондеже совершится целование.

Стихиры Честного Креста, самогласны, глас 2:

Приидите верни, животворящему Древу поклонимся: на немже Христос Царь славы волею руце распростер, вознесе нас на первое блаженство, яже прежде враг сластию украд, изгнаны от Бога сотвори. Приидите верни, Древу поклонимся, имже сподобихомся невидимых враг сокрушити главы. Приидите вся отечествия языков, Крест Господень песнми почтим. Радуйся Кресте, падшаго Адама совершенное избавление: о тебе бо вернейшии царие наши хвалятся, яко твою силою исмаильтеския люди державно покаряюще. Тя ныне со страхом христиане целующе, на тебе пригвоздившагося Бога славим, глаголюще: Господи, на том пригвоздившийся помилуй нас, яко Благ и Человеколюбец.

Глас 5:

Приидите людие, преславное чудо видяще, Креста сile поклонимся, яко древо в раи смерть прозябе: сие же жизнь процвете, безгрешнаго имущее пригвожденна Господа. От Негоже вси языцы нетление вземлюще зовем: Иже Крестом смерть упразднивый, и нас свободивый, слава Тебе.

Глас тойже:

Глас пророк Твоих, Исаии и Давида, исполнился Боже, глаголющий: приидут вси языцы Господи, и поклонятся пред Тобою: се бо людие, иже Твоей Блаже благодати наполнишася, во дворех Твоих Иерусалима. Крест претерпевый за ны, и воскресением Твоим животворяй, сохрани и спаси ны.

Глас 6:

Четвероконечный мир днесь освящается, четверочастному воздвизаему Твоему Кресту Христе Боже наш, и рог верных христиан совозносится. Тем врагов сокрушаем роги, велий еси Господи, и дивен в делех Твоих, слава Тебе.

Глас тойже

Пророков гласи Древо святое предвозвестиша, имже древния свободися клятвы смертныя Адам, тварь же, днесь возносиму тому, совозвышает глас, от Бога просящи богатыя милости: но единый в благоутробии, безмерный Владыко, очищение буди нам, и спаси души наша.

Глас 8.

Глас пророка Твоего Моисеа Боже, исполнися глаголай: узрите Живот ваш висящь пред очесы вашими. Днесь Крест воздвизается, и мир от лести избавляется: днесь Христово воскресение обновляется, и концы земли радуются, в кимвах Давидски песнь Тебе приносяще и глаголюще: соделал еси спасение посреде земли Боже, Крест и воскресение: иже ради нас спасл еси Блаже и Человеколюбче, всесильне Господи, слава Тебе.

Глас тойже:

Днесь Владыка твари, и Господь славы, на Кресте пригвождается, и в ребра прободается, желчи и оцта вкушает, Сладость церковная: венцем от терния облагается, Покрываяй небо облаки, одеждею облачится поругания: и заушается бренною рукою, рукою Создавый человека. По плещама биен бывает, Одеваяй небо облаки: заплевания и раны приемлет, поношения и заушения, и вся терпит мене ради осужденного, Избавитель мой и Бог, да спасет мир от прелести, яко Благоутробен.

Слава, и ныне, глас тойже:

Днесь неприкосновенный существом, прикосновен мне бывает, и страждет страсти, избавляя мя от страстей: свет подаваяй слепым, от беззаконных устен оплеваются, и дает плещи за плененных на раны. Сего Чистая Дева и Мати на Кресте зрящи, болезненно вещаше: увы Мне Чадо Мое, что сие сотворил еси? Красный добротою паче всех человек, бездыханный, беззрачный являешися, не имея вида, ниже доброты. Увы Мне Мой свете, не могу спяща зреши Тя, утробою уязвляюся, и лютое оружие сердце мое проходит: воспеваю Твоя страсти, покланяюся благоутробию твоему. Долготерпеливе Господи, слава Тебе.